



Llywodraeth Cymru
Welsh Government

Llywodraeth Cymru

Safonau Gwasanaeth ar gyfer Addasiadau i Dai

Dyddiad cyhoeddi: Ebrill 2019

Cynnwys

1. Nod.....	3
2. Materion allweddol	3
3. Rychwant	4
4. Safonau Gwasanaeth ar gyfer darparu Addasiadau i Dai.....	4
5. Monitro a gorfodi'r Safonau Gwasanaeth	6
6. Cwynion a phryderon.....	6
Ffigur 1 – Safonau Gwasanaeth ar gyfer Addasiadau i Dai.....	7
Ffigur 2 – Diffiniadau o'r gwahanol fathau o Addasiadau i Dai.....	10

1. Nod

Mae Llywodraeth Cymru yn cydnabod y rôl hanfodol y mae addasiadau i dai'n ei chwarae o safbwynt cynorthwyo pobl anabl a phobl hŷn i fyw'n ddiogel ac yn annibynnol, sy'n gwella iechyd a lles yr unigolion, eu teuluoedd a'u gofalwyr ac sy'n lleihau'r pwysau ar wasanaethau rheng flaen megis gwasanaethau iechyd a gofal cymdeithasol.

Mae'r gwaith atal y mae addasiadau i dai'n ei gynnig yn cyd-fynd yn helaeth iawn ag egwyddorion y Ddeddf Llesiant Cenedlaethau'r Dyfodol, y Ddeddf Gwasanaethau Cymdeithasol a Llesiant a'r dull gweithredu a eglurir yn Ffyniant i Bawb a Cymru Iachach. Dylai addasiadau i dai gael eu hystyried hefyd yng nghyd-destun ehangach Deddf Cydraddoldeb 2010 ac Egwyddorion y Cenhedloedd Unedig ar gyfer Pobl Hŷn, a dylai darparwyr gwasanaeth roi sylw dyledus iddynt wrth ddarparu cymorth i ddefnyddwyr gwasanaeth.

Mae darparu cymorth ar gyfer addasiadau i dai yng Nghymru yn gymhleth ac yn adlewyrchu'r ffaith bod amryw bartneriaid yn ymwneud â'r trefniadau ar gyfer gofal a chymorth i bobl anabl a phobl hŷn.

Nod y safonau yw egluro lefel y gwasanaeth y gall defnyddwyr gwasanaeth ei ddisgwyl pan fydd **addasiad** yn cael ei ddarparu a'i osod, beth bynnag fo'r ddeiliadaeth sydd ganddynt a ble bynnag y maent yn byw. Dylai'r safonau gwasanaeth sicrhau bod darparwyr gwasanaeth yn darparu **addasiadau i dai** mewn modd mwy cyson, a dylent roi gwybod i ddefnyddwyr gwasanaeth am lefel y gwasanaeth y gallant ei ddisgwyl pan fyddant yn gwneud cais am gymorth ar ffurf addasiad.

Dylai'r safonau gwasanaeth gael eu hystyried yn adnodd cynllunio a chyflawni gan ddarparwyr gwasanaeth er mwyn sicrhau bod eu gweithdrefnau a'u systemau'n cyd-fynd gymaint ag sy'n bosibl â'r safonau ac er mwyn cydlynu ac integreiddio eu gwaith â darparwyr gwasanaeth perthnasol eraill sy'n gweithredu yn eu rhanbarth.

2. Materion allweddol

Mae adolygiadau annibynnol diweddar wedi amlygu cymhlethdod yr amryw ffyrdd y caiff addasiadau i dai eu darparu. Mae enghreifftiau o adroddiadau o'r fath yn cynnwys:

- Adolygiad o Addasiadau ar gyfer Byw'n Annibynnol: Llywodraeth Cymru (2015) ¹
- Addasiadau Tai: Swyddfa Archwilio Cymru (2018) ²

¹ <https://llyw.cymru/statistics-and-research/review-independent-living-adaptations/?lang=cy>

² <https://www.archwilio.cymru/system/files/publications/housing-adaptations-2018-welsh.pdf>

- Tai a phobl anabl – argyfwng cudd Cymru: Comisiwn Cydraddoldeb a Hawliau Dynol (2018) ³
- Addasiadau Tai: Adroddiad y Pwyllgor Cyfrifon Cyhoeddus (2018) ⁴

Mae pob adroddiad wedi nodi problemau sy'n ymwneud â chymhlethdod ariannu addasiadau a'r trefniadau anodd ar gyfer cael mynediad i wasanaethau ledled Cymru. Mae'r amryw raglenni ariannu sydd ar waith ar gyfer darparu addasiadau yng Nghymru wedi arwain at sefyllfa lle mae defnyddwyr gwasanaeth yn cael lefelau gwahanol o wasanaeth, yn dibynnu ar eu deiliadaeth a'r ardal y maent yn byw ynddi.

3. Rhychwant

Bydd y safonau hyn yn berthnasol i bob math o addasiadau i dai, ac i'r sefydliadau a'r bobl ganlynol:

- Awdurdodau lleol
- Asiantaethau Gofal a Thrwsio
- Landlordiaid cymdeithasol cofrestredig
- Sefydliadau Trosglwyddo Gwirfoddol ar Raddfa Fawr
- Therapyddion galwedigaethol
- Defnyddwyr gwasanaeth neu'u cynrychiolwyr.

Yn ogystal â'r uchod, bydd y safonau gwasanaeth yn berthnasol i weithwyr proffesiynol ym maes gofal iechyd a gwasanaethau cymdeithasol, ee nyrsys cymunedol a gweithwyr cymdeithasol.

Bydd Llywodraeth Cymru yn adolygu'r safonau yn gyson, a gall gyhoeddi safonau diwygiedig fel y bo'n briodol.

Mae gofynion deddfwriaethol sy'n ymwneud â darparu mathau penodol o addasiadau'n bwysicach nag unrhyw safonau gwasanaeth a nodir yn y ddogfen hon, a dylai darparwyr gwasanaeth ofyn am gyngor cyfreithiol lle bo angen.

4. Safonau Gwasanaeth ar gyfer darparu Addasiadau i Dai

Mae'r safonau gwasanaeth yn pennu'r lefelau gwasanaeth a ddisgwylir ar gyfer gosod addasiadau i dai, ac mae'r safonau i'w gweld yn **Ffigur 1**. Mae cyfrifoldeb ar y defnyddiwr gwasanaeth (neu'i gynrychiolydd) a'r darparwr i gydweithio'n adeiladol ac yn gydweithredol â'i gilydd tuag at gyflawni'r canlyniadau y cytunwyd arnynt, ac ni ddylai'r naill na'r llall weithredu mewn modd afresymol a allai arwain at oedi diangen neu ganlyniad anfodhaol.


Bydd pennu lefelau gwasanaeth yn helpu i sicrhau bod addasiadau i dai'n cael eu darparu mewn modd cyson, beth bynnag fo'r ddeiliadaeth sydd gan ddefnyddiwr gwasanaeth a ble bynnag y mae'n byw, a bydd hefyd yn rhoi hyblygrwydd i

³ <https://www.equalityhumanrights.com/sites/default/files/housing-and-disabled-people-wales-hidden-crisis-welsh-language-version.pdf>

⁴ <http://www.cynulliad.cymru/laid%20documents/cr-ld11703/cr-ld11703-w.pdf>

ddarparwyr gwasanaeth benderfynu ar y ffordd orau o ddefnyddio eu hadnoddau i fodloni'r safonau. Wrth ddiwallu anghenion defnyddiwr gwasanaeth, dylid nodi y gallai fod yn fwy priodol mewn rhai sefyllfaoedd i fesurau eraill gael eu hystyried a'u harchwilio cyn bod addasiad yn cael ei ystyried, ee mesurau megis gwasanaeth ailalluogi neu ailgartrefu mewn llety mwy addas, os yw hynny'n opsiwn.

Oherwydd y cymhlethdod sy'n gysylltiedig â darparu rhai addasiadau i dai, yn enwedig addasiadau mwy o faint, gall y broses arwain at nifer o gamau a allai olygu bod angen mewnbwn gan randdeiliaid ehangach megis yr adran gynllunio, timau rheoli adeiladu a chwmnïau cyfleustodau. Mae'n rhaid i'r camau hynny gael eu cymryd er mwyn sicrhau bod yr addasiad yn darparu'r help a'r cymorth gofynnol ar gyfer y defnyddiwr gwasanaeth ac er mwyn sicrhau ei fod yn bodloni gofynion deddfwriaethol ehangach. O ganlyniad, gall yr amserlenni ar gyfer darparu addasiad amrywio. Mae'r safon gwasanaeth yn **Ffigur 1** ar gyfer 'Amserlenni Disgwyliedig' wedi'i rhannu er mwyn adlewyrchu'r camau allweddol canlynol sy'n gallu bod yn gysylltiedig â phenderfynu a ddylid darparu addasiad ai peidio:



- **Pwynt cyswllt cyntaf** – Hyd y cyfnod rhwng yr adeg pan fydd defnyddiwr gwasanaeth yn cysylltu gyntaf â darparwr gwasanaeth perthnasol (gallai fod yn awdurdod lleol, yn Asiantaeth Gofal a Thrwsio, yn gymdeithas dai neu'n rhywrai y mae'r defnyddiwr gwasanaeth mewn cysylltiad â nhw yn y sector iechyd neu'r sector gwasanaethau cymdeithasol) a'r adeg pan fydd yn cael ei asesu gan unigolyn cymwys (megis therapydd galwedigaethol neu asesydd dibynadwy);
- **Cadarnhau bod yr addasiad yn angenrheidiol** – Yr amserlen ar gyfer sicrhau bod therapydd galwedigaethol (neu unigolyn cymwys arall) yn darparu adroddiad/atgyfeiriad/argymhelliad i'r darparwr gwasanaeth, sy'n egluro'r gwaith addasu gofynnol;
- **Gosod yr addasiad** – Hyd y cyfnod rhwng dyddiad yr atgyfeiriad (neu'r penderfyniad, yr argymhelliad, yr adroddiad) a wnaed gan yr unigolyn cymwys, pan gadarnheir bod angen yr addasiad, a'r adeg pan gaiff yr addasiad ei osod. Diben hynny yw sicrhau bod mathau eraill o gymorth (ee gwasanaeth ailalluogi) yn cael eu hystyried cyn penderfynu bod angen addasiad.

Mae Llywodraeth Cymru yn disgwyl i ddarparwyr gwasanaeth gydweithredu â therapyddion galwedigaethol (neu unigolion cymwys eraill a all gynnig cyngor a

nodi'r addasiad sy'n ofynnol) yn ogystal â defnyddwyr gwasanaeth er mwyn sicrhau bod y canlyniad gorau posibl yn cael ei gyflawni, gan barhau i adlewyrchu'r egwyddorion bod unrhyw waith yn **angenrheidiol** ac yn **briodol**, yn **rhesymol** ac yn **ymarferol**.

Caiff y diffiniadau o'r gwahanol fathau o addasiadau i dai (bach, canolig neu fawr) eu rhestru yn **Ffigur 2**. Maent wedi'u cynnwys er mwyn rhoi canllaw i ddarparwyr gwasanaeth ynghylch penderfynu sut i gofnodi'r math mwyaf priodol o addasiad (bach, canolig neu fawr). Dylai unrhyw sefyllfaoedd a gaiff eu hystyried yn rhai brys, ee er mwyn hwyluso'r broses o ryddhau rhywun o'r ysbyty, hwyluso pecyn gofal lliniarol neu atal rhywun rhag cael ei dderbyn i'r ysbyty neu i gartref gofal, gael eu blaenoriaethu a'u gwireddu cyn gynted ag sy'n ymarferol bosibl.

Yn ogystal, bwriedir i'r diffiniadau yn **Ffigur 2** geisio helpu defnyddwyr gwasanaeth i ddeall y gwahanol fathau o addasiadau sydd ar gael a beth y gallant ei ddisgwyl o ran sut y cânt eu darparu gan y darparwr gwasanaeth.

Mae Llywodraeth Cymru yn cydnabod y gallai sefyllfaoedd neu achosion unigol godi nad ydynt yn cyd-fynd â'r categorïau sydd yn **Ffigur 2** am amryw resymau. Mewn achosion o'r fath, **dylai darparwyr gwasanaeth ddefnyddio eu barn broffesiynol i benderfynu pa gategori sydd fwyaf priodol i'w ddefnyddio, ar sail tystiolaeth a barn ddiuedd.**

5. Monitro a gorfodi'r Safonau Gwasanaeth

Caiff data monitro perfformiad ei gyflwyno i Lywodraeth Cymru gan ddefnyddio'r fethodoleg casglu data ar gyfer 'Monitro Data Addasiadau i Dai', a fydd yn helpu i ddangos cynnydd o safbwynt bodloni'r safonau gwasanaeth. Bydd y data a gesglir drwy'r broses hon yn cael ei gyhoeddi bob blwyddyn. Mae Llywodraeth Cymru wedi diwygio'r telerau a'r amodau ar gyfer nifer o grantiau a ddarperir ganddi ar gyfer addasiadau i dai er mwyn i ddarparwyr gwasanaeth weithio'n unol â'r safonau gwasanaeth.

6. Cwynion a phryderon

Os nad yw defnyddiwr gwasanaeth yn fodlon â lefel y gwasanaeth a gafodd, mae ganddo hawl i gwyno. Dylid cyfeirio unrhyw gwynion at y darparwr gwasanaeth a dylid ymdrin â nhw'n unol â gweithdrefn gwyno sefydliad y darparwr.

Ffigur 1 – Safonau Gwasanaeth ar gyfer Addasiadau i Dai

Safon Gwasanaeth	Lefel y gwasanaeth a ddisgwylir
<p>Safon 1: <i>Diben</i></p>	<p>Gall addasiad gynnig nifer o fanteision, ond ei brif ddiben yw helpu pobl anabl a/neu bobl hŷn a chynorthwyo eu gofalwyr i:</p> <ul style="list-style-type: none"> • ddileu'r rhwystrau a all olygu bod pobl yn cael eu hanablu gan eu hamgylchedd yn hytrach na'r namau sydd ganddynt (y model cymdeithasol o anabledd); • parhau i fyw'n annibynnol neu i ddod yn fwy annibynnol yn eu cartrefi eu hunain; • hwyluso'r broses o ryddhau rhywun yn gynt o'r ysbyty; ac • atal unrhyw gwympiadau pellach. <p>Dylai'r addasiad a ddarperir fod yn angenrheidiol ac yn briodol, a dylai fod yn rhesymol ac yn ymarferol hefyd.</p>
<p>Safon 2: <i>Cydraddoldeb ac Amrywiaeth</i></p>	<p>Gall pobl anabl a/neu bobl hŷn ddisgwyl cael eu trin yn deg gyda pharch. Bydd darparwyr gwasanaeth yn sicrhau bod polisiau cydraddoldeb ac amrywiaeth ganddynt ar waith i sicrhau hynny a bod staff wedi ymgymryd â'r hyfforddiant priodol ynghylch ymwybyddiaeth o anabledd.</p>
<p>Safon 3: <i>Cyfathrebu</i></p>	<p>Dylai cyfathrebu fod yn broses ddwy ffordd rhwng y darparwr gwasanaeth a'r defnyddiwr gwasanaeth (neu'i gynrychiolydd) a dylai fod yn seiliedig ar egwyddorion cydgynhyrchu a'r sgwrs ynghylch 'yr hyn sy'n bwysig' a gymeradwyir yn y Ddeddf Llesiant Cenedlaethau'r Dyfodol a'r Ddeddf Gwasanaethau Cymdeithasol a Llesiant. Bydd unrhyw wybodaeth a negeseuon mewn fformat sy'n diwallu anghenion defnyddiwr gwasanaeth yn y modd mwyaf effeithiol, er enghraifft byddant ar gael yn Gymraeg ac yn Saesneg ac mewn fformatau hygrych sy'n cynnwys Braille, print bras, fersiynau sain ac ieithoedd eraill. Ar ddechrau'r broses, bydd y defnyddiwr gwasanaeth (neu'i gynrychiolydd) yn cael gwybod am y camau allweddol sy'n ymwneud â gosod addasiad. Dylai'r defnyddiwr gwasanaeth gael ei gynnwys yn ystyrlon yn y broses o benderfynu ynghylch y modd y caiff addasiad ei ddylunio a'i ddarparu, os yw hynny'n ymarferol. Bydd hefyd yn cael gwybod am yr amserlenni disgwylidig, bydd yn cael y wybodaeth ddiweddaraf yn rheolaidd am gynnydd a bydd yn cael ei wahodd i roi adborth tra bydd yr addasiad yn cael ei osod ac wedyn.</p>

<p>Safon 4: Ansawdd y Gwasanaeth</p>	<p>Bydd y gwaith yn cael ei gyflawni gan unigolyn cymwys, sydd naill ai'n un o weithwyr cyflogedig y darparwr gwasanaeth neu'n rhywun sydd ar ei restr o gontractwyr cymeradwy ac y mae'r darparwr gwasanaeth yn ei fonitro'n rheolaidd. Bydd yr unigolyn cymwys yn rhwym wrth weithdrefnau clir ar gyfer dewis a chadw gweithwyr a sicrhau ansawdd eu gwaith. Os bydd defnyddiwr gwasanaeth yn penderfynu defnyddio ei gontractwr ei hun i gyflawni'r gwaith, y defnyddiwr gwasanaeth fydd yn gyfrifol am ymdrin ag unrhyw broblemau a'u datrys a bydd angen iddo gael pob caniatâd gofynnol gan ei landlord os yw hynny'n briodol. Yn ogystal, gall defnyddwyr gwasanaeth gael eu cyfeirio at sefydliadau eraill neu gael cyngor cychwynnol er mwyn iddynt gael y cymorth y gallai fod arnynt ei angen.</p>
<p>Safon 5: Ansawdd y Cyfarpar</p>	<p>Bydd unrhyw gyfarpar a osodir yn cydymffurfio â'r gofynion perthnasol o ran iechyd a diogelwch ac unrhyw fanylebau technegol, a bydd yn briodol i'w ddiben arfaethedig. Dylai'r defnyddiwr gwasanaeth gael gwybodaeth hefyd am unrhyw warant, unrhyw daliadau gwasanaeth ac unrhyw ofynion cynnal a chadw os yw hynny'n briodol.</p>
<p>Safon 6: Amserlenni Disgwyliedig</p>	<p>Ar gyfer addasiadau bach: Fel rheol (hy mewn 90% o achosion), bydd yr ateb i broblem yn cael ei osod cyn pen 3 wythnos (os yw'n sefyllfa frys) neu cyn pen 4 wythnos (os nad yw'n sefyllfa frys) ar ôl dyddiad y cyswllt cyntaf â'r darparwr gwasanaeth, a fydd wedi barnu ei bod yn angenrheidiol gosod yr addasiad.</p> <p>Ar gyfer addasiadau canolig:</p> <ul style="list-style-type: none"> - Ar ôl dyddiad y cyswllt cyntaf â'r darparwr gwasanaeth, gall y defnyddiwr gwasanaeth ddisgwyl cael ei asesu cyn pen deufis gan unigolyn cymwys, ee therapydd galwedigaethol neu asesydd dibynadwy. - Os ceir cadarnhad bod yr addasiad yn angenrheidiol, bydd y therapydd galwedigaethol neu'r asesydd dibynadwy yn darparu adroddiad/atgyfeiriad/argymhelliad i'r darparwr gwasanaeth cyn pen pythefnos ar ôl i'r penderfyniad gael ei wneud. - Fel rheol bydd yr ateb i broblem yn cael ei osod cyn pen pedwar mis (neu'n unol â gofynion deddfwriaethol) ar ôl dyddiad yr atgyfeiriad/argymhelliad gan unigolyn cymwys. <p>Ar gyfer addasiadau mawr:</p> <ul style="list-style-type: none"> - Ar ôl dyddiad y cyswllt cyntaf â'r darparwr gwasanaeth, gall y defnyddiwr gwasanaeth ddisgwyl cael ei asesu cyn pen deufis gan unigolyn cymwys, ee therapydd galwedigaethol. - Pan geir cadarnhad bod yr addasiad yn angenrheidiol, bydd y therapydd galwedigaethol yn darparu adroddiad/atgyfeiriad/argymhelliad i'r darparwr gwasanaeth cyn pen pythefnos ar ôl i'r penderfyniad gael ei wneud. - Fel rheol bydd yr ateb i broblem yn cael ei osod cyn pen 15 mis (neu'n unol â gofynion deddfwriaethol) ar ôl dyddiad yr atgyfeiriad gan unigolyn cymwys. Mae hynny'n adlewyrchu'r camau sydd i'w cymryd mewn rhai achosion, ee yr angen am ganiatâd cynllunio.

Safon 7: Archwiliadau o Gymhwysra	Ar gyfer addasiadau bach: <ul style="list-style-type: none"> - Nid oes angen cynnal prawf modd. - Nid oes angen asesiad gan therapydd galwedigaethol. - Mae'n bosibl y bydd angen asesiad gan asesydd dibynadwy.
	Ar gyfer addasiadau canolig: <ul style="list-style-type: none"> - Mae'n bosibl y bydd angen cynnal prawf modd (yng nghyswllt Grant Cyfleusterau i'r Anabl yn unig). - Mae'n bosibl y bydd angen asesiad gan therapydd galwedigaethol. Fel arall, bydd angen asesiad gan asesydd dibynadwy.
	Ar gyfer addasiadau mawr: <ul style="list-style-type: none"> - Mae'n bosibl y bydd angen cynnal prawf modd (yng nghyswllt Grant Cyfleusterau i'r Anabl yn unig). - Bydd angen asesiad gan therapydd galwedigaethol. - Ni fyddai asesiad gan asesydd dibynadwy'n briodol yn yr achosion hyn.

Ffigur 2 – Diffiniadau o'r gwahanol fathau o Addasiadau i Dai

Categori	Natur y gwaith sy'n ofynnol	Enghreifftiau o waith	Ffynhonnell ariannu
<p>Addasiadau bach Mae addasiadau o'r fath yn eitemau rhad y gellir eu darparu'n gyflym iawn. Yn gyffredinol, bydd addasiad bach yn perthyn i'r disgrifiad o 'waith sy'n ofynnol yn syth i atal rhywun rhag cwmpo' neu 'waith brys sy'n ofynnol er mwyn rhyddhau rhywun o'r ysbyty'. Gellir cynnal asesiad ar ei gyfer a'i osod cyn pen rhai diwrnodau, neu ar yr un diwrnod os oes angen yr addasiad ar frys. Gall yr addasiad gael ei nodi gan nifer o staff yn y sector iechyd / y sector gwasanaethau cymdeithasol / aelodau eraill o staff sydd wedi cael hyfforddiant priodol, ee staff landlord cymdeithasol cofrestredig, staff Asiantaeth Gofal a Thrwsio.</p>	<ul style="list-style-type: none"> • Mae angen mân addasiad i'r cartref • Nid yw'n ateb arbenigol i broblem • Nid oes angen cymeradwyaeth adeiladu/cynllunio • Mae'n hyblyg / Mae modd ei addasu • Mae'n syml ac yn hawdd ei ddefnyddio • Nid oes fawr ddim gwaith cynnal a chadw a/neu wasanaethu'n gysylltiedig ag ef 	<ul style="list-style-type: none"> • Canllawiau cydio • Canllawiau ar gyfer grisiau • Rampiau bach • Tapiâu hygyrch • Blychau cadw allweddi'n ddiogel • Canllawiau coes mop • Canllawiau y tu allan • Goleuadau allanol / ar risiau • Socedi trydan ychwanegol 	<ul style="list-style-type: none"> • HWYLUSO • Y Rhaglen Addasiadau Brys • Arian landlord cymdeithasol cofrestredig • Arian yr awdurdod lleol ei hun • Arian y defnyddiwr gwasanaeth ei hun
<p>Addasiadau canolig Unrhyw addasiadau na chânt eu hystyried yn rhai bach neu fawr.</p>	<ul style="list-style-type: none"> • Mae'n bosibl bod angen addasiad mawr i'r cartref ond nid oes angen cymeradwyaeth adeiladu/cynllunio 	<ul style="list-style-type: none"> • Cawod heb ris i fynd i mewn iddi • Liffitiau grisiau • Rampiau mawr • Cyfuniad o addasiadau a gyflawnir yn rhan o un prosiect 	<ul style="list-style-type: none"> • HWYLUSO • Arian landlord cymdeithasol cofrestredig • Arian yr awdurdod lleol ei hun • Grantiau Addasiadau Ffisegol • Grantiau Cyfleusterau i'r Anabl • Arian y defnyddiwr gwasanaeth ei hun

<p>Addasiadau mawr Maent yn waith a fydd yn gofyn am asesiadau arbenigol, cymeradwyaeth statudol ac addasiadau mawr i eiddo, megis estyniadau a lifftiau sy'n mynd o'r naill lawr i'r llall. Bydd angen asesiad gan therapydd galwedigaethol, ac mae'n bosibl y bydd angen caniatâd cynllunio.</p>	<ul style="list-style-type: none"> • Mae angen addasiad mawr i'r cartref / newid strwythurol mawr • Mae angen atebion arbenigol / arloesol i broblem • Mae angen cymeradwyaeth adeiladu/cynllunio • Mae'n addasiad sefydlog / parhaol / hirdymor • Mae'n addasiad cymhleth / anghyfarwydd / mae'n gofyn am hyfforddiant a goruchwyliaeth • Mae'r ateb yn gofyn am arbenigedd i'w osod a'i gynnal a'i gadw 	<ul style="list-style-type: none"> • Codi estyniad er mwyn darparu ystafell wely a/neu ystafell ymolchi i lawr y grisiau • Liff't sy'n mynd o'r naill lawr i'r llall • Addasiadau strwythurol mew'nol sy'n sylweddol, ee symud ystafell ymolchi neu gegin 	<ul style="list-style-type: none"> • Grantiau Cyfleusterau i'r Anabl • Grantiau Addasiadau Ffisegol • Arian landlord cymdeithasol cofrestredig • Arian yr awdurdod lleol ei hun • Arian y defnyddiwr gwasanaeth ei hun
--	---	--	---